



como un estímulo mas cu ta alimenta e determinacion pa cumpli cu e metanan pone nos dilanti como pais y como comunidad. Aruba ta bon riba e caminda pa bira un pais modelo na mundo, pero

mas importante ainda ta cu, Aruba ta birando un pueblo cu ta economicamente stabil, su ciudadanonan ta gosa di un nivel halto di bida mientras cu na mesun momento ta respeta e medio ambiente.

Gabinete Mike Eman I y II ta satisfecho y honra cu reconocimiento di National Geographic pa Aruba como Destinacion di Liderazgo

DESPUES di a pasa e mainta bishitando habitantenan di Yuwana Morto Complex, ehempel di un bario cu ta yama e concepto di sostenibilidad bon bini y ta muestra di sentido comunitario, Prome Minister Mike Eman tabatin e placer di a wordo informa riba e premio cu Aruba a haya como 'Destinacion di Liderazgo' den e World Legacy Awards di National Geographic. El a comparti e sentimento di satisfaccion cu su coleganan di Gabinete di Minister cu como un ekipo ta traha riba e vision di sostenibilidad y bienestar socio economico. Aruba a bira merecedo di e premio aki pa su vision y esfuersonan haci riba tereno di desaroyo sostenibel y tambe con esakinan ta traduci nan mes den e industria di turismo. Momentonan asina ta yena nos tur cu un sinti di satisfaccion y orguyo, pero

tambe di un compromiso renoba pa sigui traha na bienestar di nos pueblo y nos pais. E categoria di Destination Leadership ta reconoce e liderazgo di un destinacion, incluyendo ciudad, provincia, estado, pais y region cu ta demostrando e mihor practica ambiental, proteccion di herencia cultural y natural, beneficio pa e comunidad local y ta educa su bishitantenan riba e principianan di sostenibilidad.

Den e premionan a participa un total di 260 diferente destino. Den e categoria aki, Aruba tabata e top 3 finalista hunto cu Delaware North Companies Parks & Resorts na Yosemite National Park, Merca y Val D'Aran, Spaña.

E descripcion di Aruba ta menciona e.o. e relacion di cooperacion cu ta existi Carbon War Room y con

Aruba ta demostrando loke ta posibel den e lucha global contra e cambio climatico. "Cu hopi recurso di solo y biento, Aruba a inverti grandemente den energia renobabel y ta trahando den direccion di e meta pa bira e prome pais na mundo cu ta liber di combustibel fosil pa 2020." Tambe ta menciona con di parti di Aruba Tourism Authority ta traha cu doñonan di negoshi pa crea 'destinacionnan cu por cana' dor di adapta nan modelo di 'smart growth' y baha dependencia di auto. Algo hopi importante cu tambe a keda remarca den e argumentonan pakico Aruba ta merece e premio aki ta cu 6 otro isla den Caribe awor a adapta e 'Modelo Aruba' y ta pusha nan mesun transicion den direccion di bira destinacionnan mas sostenibel. Gabinete Mike Eman II ta wak e premio aki



Continuacion di Pagina 8

Bon Dia Aruba, a puntra sra. Maya con e acogida ta, e ta conta cu algun 20 mucha a inscribi pero algun 10 so presenta cual el a haya un poco fastioso mirando cu hopi mucha mas kier a bin pero e cupo tabata limita. "E muchanan a yega e prome mainta cu nan cara manera, ay ta weekend pakico mi mester ta akinan. Pero despues nan a bira hopi contento y awo nan ta tristo cu e programa a caba. Nan ta papia di negoshi, di inversion, di habito nan di hende rico, habito di hende pover etc. E muchanan aki ta super sabi, ora nan a yega e prome dia bisando cosnan manera: mi kier ta miyonario, mi kier un ferrari etc. Y a medida cu nan a sigui e camp nan mentalidad a cambia y e siguiente dia, nan a bisa cosnan manera: 'uhm, bosa mi ta kere miho mi bira un inversionista, mi kier yuda hende'. Sra. Maya ta comenta. Tambe e ta bisa cu lo cual mas a sorprende su persona ta e concepto di duna les na muchanan ya cu e ta asina custuma na duna les y presentacionnan na aduhtonan. Cu mucha e ta un reto, pero e ta siña asina hopi cos su mes ya cu e programa ta asina extenso.

Circulo vicioso

Pa sra. Maya ta hopi importante pa dreña e scolnan y haci esaki accesibel na tur mucha. E ta conta Bon Dia Aruba, cu e tabata studia hopi di cerca e muchanan cu a bin e camp y manera el a spera, mayoria ta muchanan cu tin mayornan cu ya caba tin profesionnan den managment y ta studia etc. Y mientras esaki ta algo bon, locual di berdad e kier ta



yega mas cerca na muchanan di famianan di menos entrada pa asina nan por siña educacion financiero y kibra e circulo vicioso. Otro cos tambe cu sra. Maya a tuma nota di dje ta con confortabel e muchanan ta cu e les na Ingles. E intencion tabata cu sra. Donatti lo bin duna esaki y sra. Maya lo traduci, pero e muchanan no tabata tin problema algun cu e idioma. "Nos a dicidi di laga esaki na Ingles, mirando cu con cu bay bin e ta un vak na scol. E ta bira un ayudo extra pa nan cu nan curriculum", Sra. Maya ta bisa.

Escogencia

Bon Dia Aruba, a puntra sra. Maya si tin algo cu e ta considerando cambia pa e siman cu ta bin. E ta splica cu no, cu e ta sumamente contento cu e programa y e ta agradecido cu el a pasa 5 aña ta haci estudio pa haya un programa di educacion financiero cu lo ta apropiado pa muchanan di e isla. "Ainda mi ta haciendo mas estudio pa wak otro programanan. Pero mi ta kere

mi lo kier keda cu esaki. E no ta laf, e ta hopi completo. E ta hopi diferente di e manera di duna les na scolnan. E ta hopi interactivo, ma scoge

esaki pa e region paso nos ta bay expande pa mas isla tambe. Tin ora hende ta busca cos riba internet y tur hende ta kere nan tin e miho pro-

grama, pues bo mester busca tur rond di mundo y analisa esaki. Por ta nos lo cambia y improvisa, dependiendo di e edadnan. Pero nos ta contento."

Sra. Maya ta bisa. □